



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8 Yangia anidakangma : Tir Yimiyim tiryimiyim@aolima tir yimiyim TAPAK 3



Tir Duterte-i Philippines
Senate atema tokteptsü



Kiren Rijiju-i West Siang district
nung mapatong aika lapoktsü

VOL. XIX ONO. 39 (ADOK 39) DIMAPUR SANGTENNÜ (TUESDAY) YIMPOKSÜI (NOVEMBER) 16, 2021 ₹ 5.00

NMA-i amakba aitsür; Yimjung alitsü ayongzüker

Dimapur, November 15, 2021 (TYO): November 13, 2021 nü Manipur kübok Churachandpur district nung Assam Rifles convoy amakba aitsür ta Naga Mothers Association (NMA)-i ashi aser parnokisa azütokshitepba anentsü mepishia metetdaksüogo.

"Nagaland nungi sepai ka dena Assam Rifles sepaitem den tetsü ka aser lar jabaso dena khasetba aitsür. Telungpur telok ajaki yimjung atema meimchir temetentem aser tetsürtem temetentem akhümtsübutisüla" ta NMA president Abeiu Meru aser

secretary Lochumbeni Humtsoe nati sangdong ka nung ashi.

Yimjung mapang ka lir aser azütokshitepba ajanga telemtebba kecha melitetsü. Tetsürtem aser tetsürtem Armed Forces Special Power Act (AFSPA) ta ajaba tashiyim ozüing kübok alir aser iba ozüing kübok mapa tamajung inyaker" ta NMA-i metetdaksü.

India sorkari AFSPA agientsüla aser Northeast tesem ajungalen yimjung aser tensa süngjemsüsa mapa inyaksü ayongzüker, ta parnokisa ashi.

COVID-19 Nagaland: Nisung 32,000 adenogo

Kohima, November 15, 2021 (TYO): Nagaland nung Hombarnü nisung 17 dak COVID-19 putetba züingsema nisung 32,000 tema adenogo.

"Tanü putetertemji Dimapur nung 12, Mokokchung nung 4 aser Zunheboto nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

Parnok züingsema Nagaland nung COVID-19 puteter ajak agi nisung ajak agi 32,014 kümogo.

"Taoba ghonda 24 tsüingda COVID-19 puteta alir nisung 21 taneptsü angu. Parnokji Mokokchung nung 9, Dimapur nung 7, Kiphire o Peren nung anana (2) aser Kohima nung 1 lir" ta Dr. Kikon-i ashi.

Nisung 32,014 rongnungi 30,109 taneptsü nguogo aser ibaji taneptsü angur 94.04% lir, ta paisa shisem.

Tang nisung 161 anepaludar

saka parnok 130 dakbo shirangba yimya kecha mali, ta Dr. Kikon-isa metetdaksü.

Hombarnü Kohima nung COVID-19 puteta alir nisung ana asü aser tena züingsema tasür ajak agi 694 kümogo.

"Deobar tashi nung nisung 718,167 nem COVID-19 vaccine indang dose 12,37,102 agütsüogo" ta State Immunization Officer, Dr. Ritu Thurr-ia ashi.

"Vaccine agirtemji frontline workers 60,969, healthcare workers 15,999, arishi küm 45 ser tempur 203,867 aser arishi küm 18 nungi 44 tsüingda alir 437,332 lir" ta paisa ashi.

"Vaccine agirtem rongnung nisung 518,935-i dose anaprong agiogo. Parnokji frontline workers 48,166, healthcare workers 13,460, arishi küm 45 ser tempur 166,713 aser arishi küm 18 nungi 44 tsüingda alir 290,596 lir" ta Dr Thurr-isa metetdaksü.

Manipur nung IEDs tesashia aika ngutetogo

Guwahati, November 15, 2021 (Agencies): Manipur nung Hombarnü sepaitemi tesem asem nung Improvised Explosive Device (IEDs) aika ngutetogo.

Anogo ana tejakdang telungpurtemi Assam Rifles Colonel ka dena nisung 7 tepsetba sülen tanü IEDs ngutet.

Imphal East district kübok Aribam Sashikumar Sharma indang gate anasa IED tesashi ka polythene nung alepbanger aliba angu, ta police-i ashi.

Iba IED anguba sülen bomb aser dog squads tesem tonga ao aser bomb ji raksa endok. IED denji digital watch ka, 9-volt battery sendaktepa liasü aser tiffin box ka liasü.

Tiffin box nung special detonator, gelatin (500 gm) aser splinters enoka liasü.

Deobarnü Imphal East district kübok MLA, L. Shusindro Singh'er ki anasa police-i IED ka mobile

phone handset den sendakteper yuja aliba angu.

Deobarnüsa Kakching district kübok Yangbi primary school anasa lenmang nung juli ka nung teka agi yangluba crude bombs 20 enoka aliba angu.

Honibarnü Assam Rifles-i Manipur Police den külemi mita aodang Kakching district kübok Wabagai Yanbi High school anasa 'Lathode' ta ajaba M-79 grenades 20 tashi ngutet.

Honibarnü Churachandpur district nung People's Liberation Army (PLA) aser Manipur Naga People's Front (MNPF) züingsema amakdang Assam Rifles Colonel Viplav Tripathi aser sepai pezü khaset.

Iba lendong nung Tripathi kinungsü aser par jabaso na tepset. Hombarnüa Army, Assam Rifles aser Manipur Police commando temi telungpurtem aptsü atema maneni mapa inyakogo.

PM Modi-i NCC Alumni Association tenzüksütsü

New Delhi, November 15, 2021 (Agencies): Prime Minister Narendra Modi-i November 19, 2021 nü National Cadet Corps Alumni Association tenzüksütsü.

Uttar Pradesh kübok Jhansi nung sentong ka nung pai National Cadet Corps Alumni Association tenzüksütsü.

"National Cadet Corps Alumni Association nung mezüingbuba züingsema PM Modi asütsü" ta Defence Secretary Ajay Kumar-ia ashi.

"PM Modi-isa linük asoshi

sentong aser mapatong 8 tenzüksütsü aser iba nung taruba küm ana tsüingda Sainik School 100 lapoktsüba dena lir" ta Defence Secretary-i Hombarnü metetdaksü.

Artsü aser tzükümlen aliba district tem nung school 1,283 nung NCC tenzüksütsü, ta Ajay Kumar-isa ashi.

"Iba nung arrtsülen aliba tesemtem 896, tzükümlen aliba tesemtem 255 aser Indian Air Force aliba stations 132 dena lir" ta paisa shisem.

NLA session nung SARFAESI Act benoktsü

Kohima, November 15, 2021 (TYO): November 25, 2021 nü Assembly session agidang Nagaland Legislative Assembly (NLA) Select Committee-i SARFAESI Act, 2002 benoktsü ta metetdaksüogo.

Hombarnü Chief Minister Neiphiu Rio menden ser senden amendang iba telemtebba agi. Senden nung taoba Chief Minister T R Zeliang, Chief Secretary J Alam aser tangartem aden, ta Planning & Coordination, Land Revenue and Parliamentary Affairs Minister Minister Neiba Kronu-i ashi.

Securitisation and Reconstruction of Financial Assets and Enforcement of Security Interest (SARFAESI) Act, 2002 reprangtsü atema taküm February ita NLA Select Committee tenteta liasü.

SARFAESI Act, 2002 ajanga Constitution nung Arlla 371(A)

nung kongshiba onüktem shisadangba aser ano video conference ajanga Nagaland indang Advocate General indang tebilemba angadanga sülen Committee-i taruba Assembly session nung benoktsü lemtet, ta Kronu-i ashi.

Bank-i Naga nung kimung/kiojen agira, ibaji bendanger nem masü saka lisopur dang dang ayoktsüla ta Committee-i bilemer. SARFAESI Act, 2002 aser Arlla 371(A) tsüingda mangatetep adoktsü madoktsü ta onoki reprangdangogo saka timtem kecha mali ta jangjaogo, ta pai metetdaksü.

SARFAESI Act ya central Act ka lir aser bank-i kimung/kiojen agira okadakia kecha ashtisü makok, saka asenok indang ali ozüing lir aser iba ajanga bendanger dang meyoctetsü, ta Kronu-isa ashi.

SARFAESI Act ya central

Act ka asü nung state sorkari yanglushitsü makok saka iba Act ajanga asen lima aser rongsenketzüng nung timtem kecha magütsütsü, ta paisa shisem.

State sorkari kimung/kiojen bendanger dang mayoktsüla ta shidi züluba State Level Bankers Committee-ia agizükogo, ta Minister Kronu-isa metetdaksü.

"Nagaland nung Assam Land Laws amshia moutettsü aser iba jagi Nagaland indang land law ka yanglutsü atema Land Revenue department-i inyakdar. Asenoki Assam Land Laws agientsüla aser asen state indang Land Law ka ayutsüla" ta paisa ashi.

State sorkari Land Revenue Department aser tangartem dang ita ana tsüingda iba mapa inyaker osang agütsütsü mapang atakzüksüogo, ta Kronu-isa shisem.

Lanur 56-i tour guide training agiogo

Kohima, November 15, 2021 (TYO): Nagaland nung YouthNet-i Pier Tours den yaritepa taküm August ita nung tour guide training ka tenzüka agi aser iba sentong nung lanur 56-i takok ngua tembangogo.

Iba sentong ya Nagaland Department of Planning & Coordination ajanga teyari agütsü aser Department of Tourism-ia nungit.

Arishi küm 18 ser tempurtemi tourism sector nung mapa inyaka aotsü atema tesayuba balala agütsü.

Training nung adener teimba ka Kohima, Dimapur, Mokokchung, Kiphire, Phek aser Wokha nungi lir aser parnokki anogo 30 nü training nung denogo aser 'completion certificates' angu.

Hombarnü YouthNet Main office nung tenügang agütsüba

sentong ka ayonga agi aser iba sentong nung Planning & Coordination, Land Revenue and Parliamentary Affairs Minister, Neiba Kronu aser Commissioner & Secretary, Department of Tourism I. Kitto Zhimomi nati tetushi süa jaokertem ama shilem agi.

"Nagaland tourism nung teinyaktsü lenmang aika sadema lir kechiyong Naga nung dak molungso aser bendanger pelaa agizükba tangatetba lir. Tour guides-i shisa kaa mapa inyaksü aser tourism sector indang maongkatem agiang" ta Minister Kronu-i ashi.

Tourist guides ya kanga dang tongtipang saka tesem kanga junga meteta alitsü tim. Tangari Nagaland semdangnür aser alima tobur ajungba, sobaliba aser inyakyimtem reprangnür. Iba yagi tourism sector ajungkettsü

ta pai ashi.

"State sorkari tourism industry renlokdaoktsütsü atema süoki ia bilemer anungji lanurtemi asen state indang putiotsü balaka asüba metettsüla aser angatettsüla aser Nagaland atema ambassador inyaksüla" ta Minister Kronu-isa metetdaksü.

"Tourism sector nung tour guides ya tongtipurtem lir aser parnokki tourists nem tajungtiba agütsütsüla. Nenok otsü ashir tajungtem asütsüla kechiyong Nagaland nung tangari memetetba otsü aika lir" ta Kitto Zhimomi-ia ashi.

YouthNet Director Nuneseno Chase-i ashiba agi "tour guide program ajanga training agir nisung 6 nem maongka ka agütsü aser ibaji Hanifl Centre, Uttarakhand nung anogo 10 nü intensive outdoor training program agiba liasü."

Mangkolemba ghonda 12 shibanger lungkak ait



Dimapur, November 15, 2021 (TYO): Mangkolemba nung Civil Society Organisation (CSO)-i November 15, 2021 nü Mangkolemba ajungba shibanger lungkak aitogo.

Mangkolemba sub-division nung alirtemi ola adokba state sorkari mangashii dang toktsüra lungkak aitba tasembuba shilem tesashiba

nung agitsü ta parnokisa metetdaksüogo.

State sorkari Mangkolemba-Longnak (11 KM) road nung lenmang, apu aser kilentzü ayimda jungjunga yangluang ta takhangba agüja tanep 06:00 ako nungi nikongdang 06:00 ako tashi Mangkolemba ajunga shibanger lungkak ait.

Iba ya Civil Society

Organisation (CSO), Mangkolemba-i lungkak aitba tanabuba shilem lir.

Additional Deputy Commissioner, sorkar ketdangsrtem, ward councils, sepaitem aser public-i mokdang nung shilem agiba atema pelar, ta CSO Convenor I Tia Jamir aser Secretary Wapongtoshi nati sangdong ka nung ashi.

Waromung Shisashir Telongjem Kohima pur Hon Jubilee mungogo



Dimapur, Yimpoksüi/Nov. 15 (TYO): Waromung Shisashir Telongjem, Kohima pur Hon Jubilee mung November 13, 2021 nü Molu Ki, Kohima nung "Putu tasen den Jangyu Medema" omen nung ajemdaker munga liasü.

Iba sentong nung tongti tesemdanger, Dr. Longrineken, Advisor, National Highways and Treasuries & Accounts, Govt. of Nagaland ajanga iba kaketshir tentet nung tezükur dang pelaba lemsatepa liasü.

Kaketshir ka atema marks tajung anguba kisüngji masü saka danga wadang nunga mapa inyak ashitsüla, kechiaser itemji ajanga tarutsü nung yaritsü, ta pai ashi.

Sorkar mapa dak alaka kaketshir dang danga mapa nunga temolung agütsütsü ajungshia liasü. Kaketshir temi lungjemer ochishia inyaktsüla

aser Tsüngrem teyari bushitsüla aser yimtsüng ka kisüng atema masü saka Nagaland ajanga temaba jenjangi ajungkettsü atema inyaktsüla, ta Advisor, Dr. Longrineken-i ayongzükä liasü.

Onük jembir Er. Moa Aier, Chief Engineer, Department of Power, Govt. of Nagaland ajanga "Putu tasen den Jangyu Medema" omen nung ajemdaker jembiba mapang, danga mapa inyaktsü maliba kisüng agi formal education mebushitsüla, ta ashi.

Kaketshir kati tajangshiba tasen ajurutsü renema alitsüla aser inyaktsüla. Kaketshir kati text book nung aliba shisatsü kisüng masü saka pei sasa ajitetba khuret koktetsüla, ta pai ashi.

Tsüraburtemia tanurtem sorkar mapa ngudaktsütsü atema angatetba melenshitsüla. Tsürabur aser tanurtem

tangatetep alitsüla, sensaksem akatsüla aser sentong tajungtiba nung yanglutsüla.

Kaketshirtem tangatetba tsütsü temeden alitsüla, koba temeden ajak dang tongtipangtiba lir, ta Er. Moa Aier-i ashi.

Taoba mapang asen sasa asen tenük shibang aser asen temeden ayok. Saka tanübo kaketshirtemi tasü ita aser temolung ulua putu tasen nung meraoktsüla aser asen temeden tanaben agitsüla, ta pai ashi.

Iba sentong nung Narosenla Longchar aser Sungjemrenba Jamir menden liasü aser Rev. M. Asangba Longkumer ajanga sentong tenzüka sarasadem.

Lokti balala nungi o tatsütsü jembia liasü aser Jubilee Choir ajanga temeja ken ka tena liasü.

Maneni sentong tembanga Rev. Arenla Longchar-i sarasadema liasü.

Class VIII aser IX pur Phase II tatidang atema metetdaksür

Dimapur, Yimpoksüi/Nov. 15 (TYO): Taoba mapang sangdongba nung bendenloksema, Nagaland Board of School Education nung register süa aliba kaketshir reju ajunga nung Class-VIII Examination (Government school tem kisüng atema) aser Class-IX Final Examination 2021 Phase-II Examination ya December 6, 2021 nü nungi tenzüka offline mode nung agitsü, ta NBSE sangdong ka ajanga ashi.

Tatidang routine ya Board indang portal nbsenl.edu.in nung angutsü.

Private school ajungai

assessment pattern tasenba sülen anidaktsüla aser Class-VIII tatidang ya kasa routine nung agitsüla.

Class-VIII aser Class-IX asoshi subject ajunga indang tasüngdangba paper indang blueprint ya annexures nung agüja lir.

Anungji Board nung Register süa aliba Institution indang tekolakpur ajunga dang Class-VIII aser Class-IX Final Examination 2021 atema Phase-II Examination atema subject shia blueprint agizüktsü aser tesayur tem dang annexures nung agüja aliba ama

subject shia blueprint sülen anidaka totuyuba agütsütsüla, koba Board indang portal nbsenl.edu.in nung angutsü.

Register süa aliba kaketshir reju tekolak tem dang subject teacher dang question paper indang blueprint indang metetdaksütsü ashi.

Tesayurtemi kaketshirtem dang blueprint nung agüja aliba ama unit/topic/chapter balala nungi arutsü imlaba tasüngdangba tem sayutsüla. Kaketshir dang subject balala indang blueprint metetdaksütsüla, aji asünung dang parnoki tatidang nung junga shilem agitetsü.



IMDH, Mokokchung nung November 15, 2021 nü "Safety, Quality and Nurturing care- Birth Right of Every Newborn" omen nung ajemdaker National Newborn Week tenzüka mapang tangokba noksa nung Chief Medical Officer Mokokchung, Medical Superintendent IMDH, Medical Officer aser Staff tem angur. November 15 nungi 21 tashi iba Newborn week amungba mapang ASHAs temi Home Based Newborn Care Visits (HBNC), Monitoring and quality visits to SNCUs, NBSUs aser Comprehensive New born Screening balala inyaktsü.

TEPELA TASOBA ANOGO

Asen tsürabur TALIKABA LKR (Molungkimong) tanü tashi arishia aser takum tajung nung arishi küm 105 (küm noklang ka ser pungo) renteta lidaktsüba asoshi teyanglur Tsüngrem nem tenüngsang tulu agütsür. Ano maneni Obala arishia moajang ta chirnurtem aser semchisemnur temi Tsüngrem dang taochi khanga sarasademer.



Asür Khuosatho Nyisou kinunger den asükhu lemsatep

Dimapur, Yimpoksüi/Nov. 15 (TYO): Ajungbena aser anojungi Meluri yimtsüng nungi taoba mapang MLA inyaka alisang Khuosatho Nyisou asüba osang angashia okok kanga aoksar, ta Ex. Minister Zachilho R. Vadeo, Ex. MLA Nuzota Swiro aser Ex-Speaker, NLA, Z. Lohe nungertemi sangdong ka ajanga ashi.

Pa lenisüba kübok Pochury nem kin ka jenjang agütsü. Pai akok tashi tajungtiba nung asen nübur tenzüko, ta par asem sangdong ajanga ashi.

Lenir ka ama pa dak ochishir,

dangar dak aria bilemba aser ajemaluba takum ka liasü. Ajidang masü pa tesüngjem takum ka liasü. Pa asüba ajanga lenir tajung ka samaba kisüng masü, külem tenzüker ka ama tamang katetba tembar aser temeim aketba adianu ka samaogo, ta par asemi ashi.

Mang yima aliba kinungtsü, chirnur aser kinunger nem Tsüngremi tesunep agüjangma aser pa tanüla teti tatem maka tesunep nung anisüngzükjang ta sarasademtsür, ta sangdong ajangasa ashi.



Nagaland House Staff tenüng nung Wennyei Konyak NCS, Dy. Resident Commissioner aser Kuolie Mere, Dy. Director & PRO (IPR), Nagaland House, New Delhi nati Ajanuo Belho, Director Tourism, Government of Nagaland ajurua la nem Japan Embassy New Delhi nungi Certificate of Commendation sempet agütsüba asoshi tenüngsang agüja liasü.

NPF Central Youth Wing Leadership Meet 2021 alitsü

Dimapur, Yimpoksüi/Nov. 15 (TYO): Naga People's Front, Central Youth Wing pur Leadership Meet 2021 sentong ya State Academy Hall nung November 18 aser 19, 2021 anogotem nung "NPF-Catalyst for Peace" omen nung ajemdaker alitsü.

Iba sentong nung MLA aser In-charge NPF Central Youth Wing, Kuzholuzo Nienu tongti tesemdanger asütsü, L Dikho NPF Legislator aser Minister (Manipur State) ya Guest

Speaker aser Dr. Lorho S Pfoze, NPF Member of Parliamentary (Manipur State) ya tongti o jembir alitsü.

Iba sentong ya November 18 nikongdang 4:00 ako nung tenzüksü aser November 19 nü sentong ya anepdang 10:00 ako nungi tenzüksü.

Iba sentong nung NPF Youths tem Nagaland, Arunachal Pradesh aser Manipur State Unit kübok Divisional Units 14 prong nungi adentsü.

Mokokchung Municipal kübok lokti nübudok alitsü

Dimapur, Yimpoksüi/Nov. 15 (TYO): ADC aser Mokokchung Municipal Council indang Administrator, Shashank Pratap Singh, IAS ajanga sangdong ka nung, November 19, 2021 anepdang 8:00 ako nungi tenzüka Mokokchung Municipal kübok ward 18 prong nung nüburtemi amshiba tesemtem, lenmang tezülen aser kilentzü aoba müreka lokti nübudok alitsü, ta metetdaksü. Iba mapa ya pei ward

ketdangtsüba kübok inyaktsü. Iba dak sendakba nung nüburtem, office aser institution ajunga dang pei temeket/tesemtem lokti nübudok mamungdang müreker alitsü totuyuba agütsür, ta sangdong ajanga ashi.

Maneni ketdangtsürtemi 2021 küm atema "Best Maintained" wards asem shimtsü asoshi tsüngdong arua repranga asadangtsü, ta kasa sangdong ajangasa ashi.

Taoba CMLal Thanhawla-i yimtenren mapa nungi anentsü



Lal Thanhawla (File photo)

Aizawl, November 15, 2021 (Agencies): Mizoram state Congress president aser taoba mapang chief minister Lal Thanhawla-i yimtenren mapa nungi yakta anentsü aser party nung lennir tetemjen ka nem kü menden agütsüsü.

Deobarnü osangbener den jembiba mapang, arishi küm 83 tain yimsüsür Thanhawla-i yimtenren mapa nungi anentsü aser 2023 küm agitsü aliba Assembly elections nung shilem magitsü lemtetba indang ashi.

Hokolbarnü, party office nung jembiba mapang Congress lennir Thanhawla-i "yimtenren mapa nungi yakta anentsü

asünung, taruba Assembly Elections nung shilem agitsü bilema mali" ta ashi.

Tanurtem, shirnok dak lennir inyaksü sempet tajung lir, parnok nem lenmang lapoktsüsü atema, 2019-2022 kümsük atema dang Congress lennir inyaksü, ta Taoba mapang Mizoram CM-isa ashi.

Taoba mapang Mizoram indang Chief Minister pungoben tashi inyaksang Thanhawla-i lennir tasen akhüm nung Congress party maneni tejakleni aotsü imlar ta lemsatop.

Tang Congress vice president aser taoba mapang finance minister Lalsawta-i Lal

Thanhawla melenzüksü akok. 1960s mapang Mizo National Front (MNF) tentet ajanga achaayangba telungpur telok nung Lal Thanhawla aden aser 1967 küm tepuokdak nungi chioikba sülen yimtenren mapa nung ajemoka inyak.

1973 küm Thanhawla ya Mizoram Pradesh Congress Committee (MPCC) indang president aküm aser tanü tashi iba telok nung pai president ka ama inyakdar.

1978 küm UT elections nung pa shimba sülen, 1998 aser 2018 küm state assembly polls ana nungdang Thanhawla-i tamakok ngudanga lir.

1984 aser 2018 küm tsüingda Thanhawla-i Mizoram indang chief minister pungoben tashi inyakdangogo.

1986 küm Union government aser MNF tsüingda Mizoram Peace Accord sign asüba mapang, MNF lennir Laldenga nem lenmang lapoktsüsü asoshi Lal Thanhawla-i Chief Minister menden nungi alu.

Arunachal-i state butterfly osang metetdaksü

Itanagar, November 15, 2021 (Agencies): Arunachal Pradesh Sorkari Kaiser-i-Hind (Teinopalpus imperialis) ya state butterfly ama sangdongogo.

Pakke Kessang district kübok Pakke Tiger Reserve nung Arunachal Pradesh Cabinet senden agiba mapang Kaiser-i-Hind ya state butterfly ama sangdongtsü asoshi telemtetba agi. Itanagar arrtsü adena orr iba senden mezüing agir asütsü.

Iba butterfly ya 'India' nüngja agüja lir aser southern China, Vietnam, Laos, Myanmar, Nepal aser Bhutan nung iba butterfly angur.

Kaiser-e-Hind ya swallowtail butterfly tapu balaka asütsü aser iba butterfly ya atang/tenem tesem nung angur.

Climate Change-Resilient aser Responsive Arunachal Pradesh dak sendakba nung, Pema Khandu Cabinet-i 'Pakke Tiger Reserve 2047 Declaration' agizüka liasü.

Tzü mopung menentsüba (emissions) aser ajak asoshi terenlok ajangzükdaksütsü nükjidong nung, 'Pakke Tiger Reserve 2047 Declaration' sangdong.

e-Cabinet portal lapokba indang osang metetdaksüba mapang, Twitter nung Chief Minister Khandu-i, "Otsüsütsüsa Seijosa nung mera tasen ka agir. Arunachal cabinet ya online ajanga achaayangtsü. Tanü, Pakke Tiger Reserve nung state cabinet senden agiba mapang e-Cabinet portal sayaogo," ta ashi.

"Iba mapatong (paperless mode) ajanga cabinet telemtetba tem mapa küma inyakba indang jenjang tajungba asadangshitsü/mittsü asoshi yaritsü," ta Khandu-i lemsatop.

Chief Minister-i, "State indang e-Cabinet ya 'green & digital growth trajectory' nung alizüing tasen ka tongtetter asütsü aser alima tzü mopung kümzüka ayutsü mapatong tali akangshidaksür," ta shisem.

Arunachal nung NSCN-KYA züingsem 3 khasat

Dibrugarh, November 15, 2021 (Agencies): Arunachal Pradesh kübok Longding district nung Hombarnü NSCN-KYA züingsem asem khasat.

Telungpurtem aliba osang angazükba sülen 6th Assam Rifles aser Longding Police külemi mita ao.

Iba tesem nung sepaitemi AK series rifles asem, injangtem aser

tanga osettem ngutetogo.

"Deobar aonung sepaitem aser NSCN telungpurtem khatop. Iba mapang sepaitemi telungpur asem khasat" ta police-i ashi.

November 14, 2021 nü NSCN- KYA züingsemtemi Tirap District kübok Lahu yim nung tanishir pur ao.

Parnoki paji Myanmar arrtsü

adena anir aotsü merang aser pa chioiktsü atema sen meshi.

Sepaitemi telungpurtem aputsü atema mapa tulu ka tenzükogo.

NSCN-KYA ya taoba küm ka tsüingda Arunachal Pradesh nung mapa kanga inyaka arur aser parnoki shishilembartem dang nungi tashiyim agi sen meshir.

Kiren Rijiju-i West Siang district nung mapatong aika lapoktsü



Kiren Rijiju

Rijiju-i Donyi Polo Government College, Kamki nung science & new academic blocks, TK indoor badminton court, Kamba police station nungi CHC tashi PMGSY roads aser Kamba town atema RIDF water supply project lapoktsü.

Education department nungi engineering wing ajanga science block yanglu. Department-i projector 1 aser wooden lecture platforms 10 agütsü, aser mapatong indang contingency nungi 1% ama Rs 50,000 indang internet charges agütsü.

Union minister Rijiju-isa panchayat, local BJP lennirtem, sorkar ketdangsürtem, GBs aser kaketshirtem den ajurutepa sensaksem.

Rijiju-i Arunachal state taginübatem atema maneni inyaksü aser state sorkari shidangba ajak agizüka shisadangsü ta metetdaksü.

Rijiju-isa PMGSY roads aser Trans-highway projects ajak tekara nung tembangtsü nangzük.

Itanagar, November 15, 2021 (Agencies): Union Law & Justice Minister Kiren Rijiju-i West Siang district nung mapatong aika sayatsüogo.

Rijiju-i college nung Science block, indoor stadium, open air gym, PMGSY road aser Water supply project lapoktsü.

Iba mapang Agriculture Minister Tage Taki, Industries Minister Tumke Bagra, Liromoba MLA Nyamar Karbak aser West Siang DC nung liasü.

GOVERNOR'S SECRETARIAT NAGALAND :: KOHIMA NOTIFICATION

Dated Kohima, the 15th November 2021

No.G-14/02-71/21/SD : Pursuance to Governor's Secretariat Notification dated 13th September 2021, the result of the essay competition is declared herewith.

Sl. No.	Topic	Winner
1	Category -I "Nagaland of my dream" for High School and Higher Secondary students of Nagaland	Miss Mariam Class 10 Baptist Higher Secondary School, Mangkolemba, Mokokchung
2.	Category -II "Blending tradition and modernity in Nagaland way forward" for University and College students of Nagaland	Miss Loni S Shikhu B.Ed (2 nd year) Mount Mary College, Dimapur
3.	Category -III "Nagaland Statehood, harnessing untapped potential of a boom" for all inhabitants of Nagaland	MrYiben B Humtsoe Tourist Colony, Wokha, Nagaland

Issued by DIPR

(T. MHABEMO YANTHAN) IAS
Commissioner & Secretary to Governor

EASTERN ART COUNCIL WITH SUPPORT FROM DEPARTMENT OF INFORMATION & PUBLIC RELATIONS AND TOURISM DEPARTMENT, GOVERNMENT OF NAGALAND PRESENTS

HiPfest

HORNBILL INTERNATIONAL PHOTO FEST
HERITAGE VILLAGE, KISAMA
1st - 10th DECEMBER 2021 ** 10:30AM - 4:00PM



PHOTO CONTEST THEME

COLOURS of NAGALAND

PRIZES: 1ST ₹25,000 | 2ND ₹20,000 | 3RD ₹15,000

AND 10 CONSOLATION PRIZES OF ₹5,000 EACH

LAST DATE OF ENTRY 25th NOVEMBER, 2021

MAIL YOUR ENTRIES TO : hipfestnagaland@gmail.com

FOR MORE DETAILS : +919436005669 | +918837262093

FOR MORE INFO, RULES & REGULATIONS

<https://www.facebook.com/hornbillinternationalphotofest/>

PHOTO EXHIBITION | ART GALLERY | SALE & COFFEE HOUSE





TIR YIMYIM YIMOBILEM (EDITORIAL)

DIMAPUR SANGTENNÜ, YIMPOKSÜ (NOVEMBER) 16, 2021

Shibaibo osangbener metsübur ?

Tanü ya India nung osangbenertem anogo , National Press Day, lir. 1966 kum iba anogo nung India nung Press Council of India (PCI) mapa tenzük. PCI tenzükba nükjidongji osangtsüsang sangdongba maparen nung osangbenertemi pei mapa nung teindang shisatsü agi züngzunga shisa tesadem agi inyaktsüsa repringtsü aser shinga nema osangbenertem amokmeren mesüdaktsütsü aser temesüzüka memesüzükdaktsütsüsa PCI-i aküpasüngtsü. Aji oda, osangbenertem asoshi PCI ya tebu amai lir, kechiyong osangbenertem nungdak aser timtem nung PCI dang ashitsü aser parnoki yarir. Tetezü, osangbenertemi bilemba aser angatetba meshitetsüsa mesüra mezülutetsüsa tezülen nungi kecha tashi nema osangbenertem mezüngmeshi mesüdaktsütsü asoshi PCI akhüm agi awabanga lir. Iba akhüm aser tazüokba nung osangtsüsang tezüluba nung aser mopong ajangaka prokshir. Iba teinyaktsü khuretemji mamai benshitsu aser nübortem ajangzüktsüsa osangtsüsang belenshiba mapa inyaktsü asoshi kum shia tanü ama Linük osangbenertem Anogo nung PCI-i anir tapet omen shimteta state ajak nung sentong balala ayongzüka shisalemsatepa amonger. Taküm kum asoshia iba anogomong atema shimteta omenji " Shibaibo osangbenertem metsübur ?" ta shimteta lir. Iba anogomong omen ya tasüngdangba temela ka dang amai, saka kodang jungjunga bilemdangdir telangzüksüji temelabo masü. Atangji, osangbener tsübutsüba aser metsübutsübaji osangbenertem dak keta lir. Osangbenertemi tatalokba aser tebilemba sangdongertem lir, anungji kecha tarendak, tetsübu aser tejak mereprangi tatalokba aser tebilemba ajak shitak indangindanga metetdaksütetra, iba osangbenerji meshitak inyaker aser ochimashitem asoshi tetsübutsüka asütsü. Tanü tesasatsüka, asen lima nungbo osangbenertem aikati yimsüsür aser lenirtemi tsübutsüsa melitetter, kechiyong osangbener aikati ochimashi mapatem bushisüngdanga osang meyanglutetter aser ochimashitemi inyakba mapatem indang yimjak nung sangdongtsüa arendaker. Ano, osangbenertem karibo pei mapa nunga ochishia indangindanga meinyaktetter. Iba jagi meteta aser memeteti osangbenertem taküm nung nübortem tsüngdang akhüm samar. Aji oda, kodang osangbenertem akhüm shingai metsübutsüsa kuma odir, iba lima aser iba nübortemjibo nisung tamajungertem alidak tanüker aser mitkar mali amato tejenokdak maka aser anepalur mali kumadoktsü. Osangbenertem ya osangbenertem dangbo masü, parnok ya mitkartem lir. Parnok saksalema aliba ajanga dang yimten aser loktiliba shitak aoer aser iba jagi tesüsa nübortem ajangzükter. Iba tashiji meteta tanü ama linük nung osangbenertem anogomong amongdang, osangbenertem rongnung ajungshiteper. Tanü ama nübortemi akümba democratic yimten nung yimsüsürtemi ozüng yanglur, ketdangser tulurtemi yimteni lemtetbatem mapa kuma inyaker aser obendangertemi ochimashi mapatem aija temerenshi agütsür. Ajisüaka, item tatalokbatemji nübortem nem shibai kechi aser koma inyaktsüla aser shibai kechi koma inyak ta asüba osangtsüsang bendena agütsür melira, nübortemi memetet ser yimten agi yimten masü kuma aotsü. Iba jagi alima ajaklen osangtsüsang abenba mapatem nem ya yimtenia kanga temulung agütsür. Atangji, osangbenertem rongnunga kari pei mapa nung indangindanga meinyaktet tamakok nguaka, ano osangbenertem aikati pei lima aser nübortem meima pei taküm nung lendong ajurua majemi, tetsübu aser nungsen ajak tizükteta inyaker. Item jagi yimten, lokti aser arogo nung lenirtemi ochimashi mapa inyakbatem kaktetsür aser item osangtem nung ajemdaker nübortemi tim teinyaktsütem inyaker. Ibayongji, talisa yimten nung meshitak aser ochimashi inyaker lenirtem aikati osangbenertem tsübur. Aji oda, lenir shibai osangbenertem tsübur aser majurutsü meranger, item lenirtem jagi nübortem ashiojka miim mapa kar inyaka alitsü. Asenoki tanga tashitemeteterem lima nung yimten lenirtem inyakyim repringra, mapang shia osangbenertem den senden lia osangbenertemi kechi asüngdangner asüngdangdakja nübortem nem yimteni inyakba mapatem osangbenertem ajanga metetdaksüba angütsü. Iba amaji, asen lima nunga yimten nung kechi inyaker nübortemi meteta inyaktsüsa, osangbenertemi pei mapa nung ano khen bendanga agütsüshitsüba anogoji tanü lir aser osangbenertemi abenba osangtem nung ajemdaker nubortemia angashir, repringer aser zünger odang meyutsüi ola adoka tim teinyaktsü inyakra, yimtena asen yimtena tajungba, loktia asen loktisa tajungba aser alimaa asen limasa tajungba akümtsü.

OLEMSABANG

ABAM SANEN LUDEN TELEMTETBA MEYIPA AGITSÜ MADOKER

~ Dr. Songsongsangba Tzudir

(Yashi adok nungi...)

Iba tatsühtep nung kum aika arur itemji repringtsü atema Join Research Committee ka 1977 (ABAM & Molungkimong) kum shim. Iba Committee ajanga Research report 1980 kum tatem Mungdangi bener aru. Iba report study asütsü atema Special Committee ka shim aser iba Committee ajanga kechi bener arudir aji tatembang asütsü 1980 ABAM Resolution No. 42 ajanga renem. Iba terenembaji yamai:

"Molungkimong Arogo otsü nung koba mangatetep mapang talangka kaa aru ibaji tembanga repringshitsü atema iba Special Committee Mungdang tenüng nung Mungdang mendenbubai shimteta agütsür. Iba yagi tamalen inyaka aliba maparen ajunga shisadanger kechi tatempang arudir aji tatempang asutsu mungdangi parnok nem tashi ajak agütsür."

Aser iba Committee jagi 7th November 1980 meeting mena lemteper tatempang akumba osang Ao Arogo ajak dangi yok. Iba Research nung Join Research Committee-i bushitetbaji ABAM Special Committee-ia agizük. Aser tatembang obendang agütsübaji Molungkimong Arogoji 1972 kum Centenary amongbaji shidak mongogo kechiyong "Molungkimong nung 24 (1872) baptiba anogo nungi tenzüka 1919 (Repalemba yimsen nungi adoka pastor inyakba) kum tashi nungji Molungkimong yimtak baptiba member metangtangi (no break) lia aru." Item kulitem ya ABAM Special Committee-i agizük aser ABAM 1980 Special Committee Members 17 yangji Chairman Rev. A. Temjen Impur, aser Secretary Apong Pastor Khar ta parnoki "sarasadema Research Report aser Lai O medemdanga iba mangatetep O tatempang akumba agütsü" aser iba tatempang akumba osang indang Ao Arogo ajak dangi yok.

Aji oda, Molungyimsen Arogo Secretarybai Arogo aser Putu tenüng nung sign sür amokmerena shity ka Dt. 8 January 1981 nung ABAM dangi yok aser kesa shity copy ABAM Executive Members; Joint Research Committee Members, aser Ao Arogo ajak dangi yok. Shityji yamai zülu: "5 BUBA ABAM Joint Research Committee-i September 30, 1980 nung renemba report koba Special Committee-i nenshia renem, iba yagi Molungyimsen Yimden-yimli aser Arogo yimli nung teyazu kuli O amshia kongshiogo. Anungji Arogo-yimli, yimden-yimli aser yimja yimkum raksatsübaibo matoker. Iba Research Committee reportji January 31, 1981 tashi nung meyipa magira (withdraw mesüra) tai temeten bushitsü asoshi tapet Court nung 5 buba ABAM joint Research Committee anema O agütsutsu aser O akatsü."

Iba tashi Molungyimsen Arogo aser Putu mendeni kanga sashia amokmeren tulu aguja tapet Court nung jaoktsü ta asüba tetsübu nung iba ken-o tanaben lapokshi aser 1981 nung ABAM Special Committee ka shima doktsü, aser parnoki bushitetba osang 1986 ABAM kum tatem mungdang nung agütsü. Mungdangi iba ken-o angadang aser TANGATETBA yamai agütsü:

"Arogo otsü maparen dak sendakba nungi adokba ken O case ama Mungdang mesüra kija arogo shingai mejembitsü, nungdakra zülua aliba kuli (document) bushiteptsü akok."

"Committee-i osang bener aruba ama Mungdangi agizüka ayu, aser iba ken-o nung Mungdangi kecha shilem (responsible) magitsü ta lemtet."

ABAM-i shilem (responsible) magitsü ta lemtetba nung Molungyimsen Arogoi 9/3/97 nung ABAM lemtet 1986 nung ajemdaknua ABAM dangi shity zülu, aser ABAM-i Molungyimsen Arogo dangi shity NO: ABAM (ESTB-2)95-96/330, Dt. 9 May 1997 ajanga "Iba onuk ya taoba mapang nung 1980 November 4-6, ABAM Resolution No. 42, aser 1986, Nov. 4-6 ABAM Resolution No. 40 ajanga mapa ajak Mungdangi tempangogo. Joko iba onuk ya tasen kuma mejembitsü Executive Committee-i lemtetogo ta asen Arogo dangi osang yoker."

Iba nungyagi kechi angateter? 1986 ABAM Lemtet Resolution No. 40 nung TANGATETBA agütsüba dak alaka iba lemtet ya agizüka yuaka IMPLEMENT masü. Ya implement asütsü lemtet asübo ABAM-i Molungkimong Arogo aser Molungyimsen arogo anaprongla loksaba (Disband) nung ajemdaker Clause/Resolution karbo zülua renemla. Anungji, Mungdangi kecha shilem (responsible) magitsü ta lemtet.

Tawa November 6, 2021 Tir Yimyim Olemsabang nung, "ABAM Sanen Luden lemtet meyipa agitsüla" ta ocet ka adok, aser iba nung ABAM-i Molungyimsen 2022 Sesquicentennial nung ABAM Executive Secretary jaokba ABAM-i shilem magitsü lemtetba ken-o nung iba ocet züluri, "1997 kum Quasquicentennial benjung amongdangbo ABAM-i 1986 telemtetba nung ajemdaker Molungyimsen aser Molungkimong arogo nung shilem agia liasü" ta shisembaji ABAM record nung koba arogo nung ABAM-i officially shilem agia aden aji angütsü aser iba mapang Executive Secretary Rev. Dr. L. Kari Longcharji tanüa pai kuli agütsütetsüsa taküm lir. Kechiyong Molungyimsen Arogoji 2001 kum ang shidakba Quasquicentennial (125) jibo 1876 nung ajemdaker ABAM-i shilem agia mongogo.

ABAM-i Mezüng Ao Arogo tenzükba aser koba Arogo 22 December 1872 nung ajemdaker 2022 nung Sesquicentennial amongtsü tetemsü lir ibaji ABAM TEMZÜNG (Revised 2016) aser ABAM NÜKLA 2030 (2016) Jili O ajanga jangjatsüogo. Saka Molungyimsen Arogoi shidakba tatalokba nung amendaker masü ABAM aser ABAM Sanen Luden amokmerena lemtetdaksüba nung dang ajemdaker Aor aser Naga nung arok Arogo otsüren raksaja 22 December 1872 Molungkimong Arogo tenzükba nung ajemdaker 2022 kum Molungyimsen Arogo 150 Sesquicentennial amongtsü renemba yabo kangasa tamashi mapa ta sasaa bilemer.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Tawa Buckinghamshire, England nung akhidang aliba St. Mary's Arogo Tenla ki tesem nung archaeologist temi Rome nung kūrakyanglu tekolak asem den aina marok ka angu. Iba Tenla ki ya 1080 C.E nung yangluba liasü saka Aso 20buba tomlen bendoka liasü. England aser Scotland na tsüngda high-speed railway yanglutsü atema iba Tenla ki bendok.

India nung Khristantemi Dalit Liberation Sunday pusema among

New Delhi, November 15 (Agencies): India nung Khristantemi Dalit Liberation Sunday mongogo.

Taküm Dalit Liberation Sunday omenji "God says NO to caste discrimination" liasü. Scheduled Castes-Backward Classes, Catholic Bishops' Conference of India (CBCI) aser National Council of Churches in India (NCCI)-i Khristantem dang iba anogomong nung bendangshidanga züngshiba Dalit nung Khristantem bilemteta sarasademtsütsü mepishia liasü.

Dalits & Lower Classes atema Indian bishops' Office secretary, Vijay Kumar Nayak-i sangdong ka ajanga, "Dalit Liberation Sunday anogomong ya Khristantem tamang jenjang tashi itshia loktiliba nung Dalit nung atema ola adoktsü asoshi tayongzükba ka lir," ta metetdakja liasü.

"Nisung ajak adianu ama kasa meimtsü aser züngshitsü atema Tsüngrem tanela nung asenok ajak longjema lir," ta kasa sangdong nung shia lir.

2007 küm nungi tenzüka küm shia CBCI aser NCCI nati Dalit Liberation Sunday ayongzükba amonger.

"Kin kar bendanga züngshibaji temenen mapa aser 'untouchability' ya ozüng alema lir. Ibayongji Arogotemi kin balala bendanga züngshiba anema ola adoka inyaker," ta November 14 nü NCCI-i metetdakja liasü.

India Arogotem nung Dalit nung Khristantem nem tim temeden magütsüba aser maongka magütsüba anema Dalit Christian Liberation Movement (DCLM)-ia ayongzükba sentong balala

India nung Dalit Khristantem sendokba dang masü saka Arogo aser loktiliba nunga Dalit nung maneni sendoker; ajioda Dalit nung temeden aser Dalit Khristantem temeden atema India nung talisa Catholic, Protestant aser Orthodox Khristantemi Dalit Liberation Sunday amonger.

India nung Dalit Khristantem sendokba dang masü saka Arogo aser loktiliba nunga Dalit nung maneni sendoker; ajioda Dalit nung temeden aser Dalit Khristantem temeden atema India nung talisa Catholic, Protestant aser Orthodox Khristantemi Dalit Liberation Sunday amonger.

India nung taoba mapang 'Untouchables' ta züngshiba Dalit nungertem maneni loktiliba nung bendangshidanga züngshir. "Dalit" olong ya Sanskrit oshi nungi agizük; tetezü "teraksa" mesüra "meshimejung" aser taoba mapang nung parnok dang "untouchables" ta nüngja jalokja liasü.

Hindu nung loktiliba nung caste system telemsa pezü nung Dalit nung maden aser parnok ya loktiliba nung jendokba nisungtem ama züngshia liasü. Ibayongji putu aika Dalit nung kanga timtema aruogo, parnokbo meimchir ama mezüngshi aser kanga sensak tia nung dang liasü.

Sorkar data ajanga ashiba agi, India nung nütsüng billion 1.2 nungi Dalit nung nütsüng million 201 lir. Ano India nung Khristan nütsüng million 25 nungi shilem 60 shibo Dalit mesüra lisopurtem lir. Dalit Khristantem timbaka India south tsütsü Andhra Pradesh, Karnataka, Kerala aser Tamil Nadu state tem nung lir.

Nüburtem dak tangatetba melira Dalit nung anema

maneni inyaksü; kibong shia nung tanur ajak dak kasa temeden lir ta tesayuba agüja intetdaksütsüla, ibaji ajangadang loktiliba nung temelenshi adoktsü, ta Khristan lenirtemi metetdaksü.

India nung linük temzüng ajanga Dalit nungersa süaka Hindu, Sikh aser Buddhist Dalit nung nem maongka balaka agütsür saka Muslim aser Khristan Dalits nembo item maongkaji magütsür, ibayongji küm shia August 10 nü "Black Day" ta ser India nung Khristantemi longkak aita amonger.

Dalit nung loktiliba aser rongsenkettsüng jenjang ajungkettsütsü atema India linük temzüng nung parnok nem sorkar mapa aser shisaliok rejutem nung menden shiteta yutsür. Ajisüaka 1950 küm August 10 nü India Tir mezüngbuba, Rajendra Prasad-i sign asüba Constitution (Scheduled Caste) Order (Paragraph 3) nung mezüngbo yamai shia liasü "Hindu yimsü dak alaka tanga yimsü amangertemji Scheduled Caste züngsem asütsü metemsü."

Sikhs nungeri item maongka akhangba sülen parnoka züngoktsü atema 1956 küm temzüng yanglushi. 1990 küm Buddhist nung nem-a kasa maongkaji agütsü. Dalit Muslim aser Dalit Khristantemia kasa maongkaji akhanger saka magizüker.

India nung Catholic Arogoi Dalit Khristantem atema kanga bilemja inyaker. CBCI-i Scheduled Castes/Scheduled classes atema inyakra dang masü saka shisaliok agütsür, court nung temepishiba ken otem agütsür aser longkak aitba sentong ayonga agir.

ANO GO ABEN TSÜNGREM DEN

Taküm Tasen

Anungji nisung kar Khrista nung lira, pa tasen poktetba. Tejenbaji süiogo, ajiang, ajak tasen kümogo. 2 Korint 5:17.

Yisu ne mulungi aitang ta asüngdangba agi na khristan ka maküm. Kodang na tanaben aso, na Khristan ka aküm. Yisui ashi, "Atangji Zünpung ni ne dang shidi, tanaben mesora, nisungi Tsüngrem yimli mungutettsü" (Yn. 3:3). Sarasadem ka ashiba mesüra yimjak nung telemtetba agiba mesüra telemtetba agi card ka sign asüba agi na mekümzüktsü. Tanaben asoba agi dang aji inyaksü akok. Tenyar Pauli ashir, kodang na "Khrista nung lidir" tejenbaji süitemer. Na tekümtet anguba anogo nung nai menaa aliba temenentem ajak adoker. Yirur na timtema aruba ajak tanebtsü angur. Nai tamakok ngua arua liaka temeim aser agizükba ne meyong akümer. Timtem tekangshi ajak joko mali moatsür.

Kari na tanela nung tanaben asoba tesüngmangtsüji nemea kümdaktsütsü ashiba nai angashitsü akok. "Tang na "Khristan süa nai tesüiba nung kechisa ajangshia aru ajakji ajangtsü aser ibaji akoktsü mapang agitsü" ta mesüra, "Na tanaben asotsü akok saka maneni na temenen den rarateptsü, aser nai ne tashi mait nung takok angutsü ta yimlar.

Tebilemstüji shibai na tanaben sodaktsür pa dangi asen taküm aotsü melen aseni merangba agi tanaben asotsü merangbaji lir. Na temenen nungi nüji akümtsü asoshi Laishiba nung tabensa kuli agütsübaji Yisu Khrista aser Tsüngremer chir asütsübaji teperi. Satani ibaji masü ta na mesüzüktsü bushir. Shiba dang nai amangtsü?

Islamic anema Israel aser Khristantem longjema lir: Israel PM



Yimpoksi/November 15, 2021: November 11, 2021 nü 5buba Christian Media Summit nung jembidang Israel Ato kilonser, Naftali Bennett-i, Khristantem aser Yihuda linük (Israel) na kanga longjema lir, ta ashi.

"Yangi Israel nung onoki tenük agi anguba tsükchir-Islam yimsü alia amangertem den rarar. Tehran (Iran yimtiba) nung tenzüka kiralongra ya Israel samatsütsü aser parnoki alima amokbangtsü nükjidong nung lir, koba ajanga alima tammang akümtsü. Akhidang nungi tang taliba Israel-i Khristantem den longjemer. Onok ya adianu aser aianutem lir. Onok longjema lir. Onoki ozü tesangwa meremsepdaktsütsü," ta Naftali Bennett-i metetdaksü.

"Akhidang nungi tang taliba Khristantemi Israel den longjemer aser Israel-ia yamaji Khristantem den longjemer," ta Bennett-i ashi.

Iba sentong ya Government Press Office-i ayongzük aser takümbo iba sentong ya online

ajanga dang agi, kechiyong tang bendangertemi Israel semdangba dak sendakba nung tenokdangbatem lir. Iba senden omenji 'AbrahamAccords' liasü. Kasa sentong nung jembidang Foreign Minister, Yair Lapid-i, "Khristan million aikati onok (Israel) pusemer, aser Yihuda nung sempaba anema inyaker. Onok otsü angaba atema nenok dang pelar," ta metetdaksü.

Lapis-isa, AbrahamAccords nükjidong ataloktsü atema Khristantem aser Khristan media-i agitsü tongtibang shilem ka lir, ta ashi.

Israel Tir, Isaac Herzog-i, "Israel anema yazü prokba anema raratsü aser Israel indang ochi osang sangdongtsü atema Israel nungeri Khristantem dak tamang akar; iba denji külemi Abraham Accords indang tesünep ataloktsü atema Khristantemi ozü partner asütsü imlar," ta ashi.

Kasa sentong nung taoba mapang Israel Ato kilonser, Benjamin Netanyahu-ia jembia liasü.

OLONG PAITEP # 5998

	1		2			3		4		5
6								7		
					8		9			
			10							
11										
				12						
13		14		15						16
17								18		

TIPILEN		LANGTSÜNGLEN	
1. Inyaker ajangtetba	- (3)	1. Meshidak	- (3)
3. Bangsemo adokdak	- (5)	2. Tanaben soshir	- (7)
6. Shitak mesüi inyak	- (7)	3. Iba anogo	- (4)
7. Ya mimong nung angur	- (3)	4. Meshi	- (3)
9. Reprangzük	- (4)	5. Yagi mi tsükloker	- (9)
10. Tasola	- (5)	6. Shi tapu ka	- (9)
11. S _ _ _ _	- (4)	8. Yagi ayimer saka ozü masü	- (3)
13. Yagi ajak ashiochtsür	- (3)	9. Ajokba shiruru ka	- (7)
15. Ki aokba oset	- (7)	12. Inyaktet	- (4)
17. Ak shi nung inokba tasen	- (5)	14. _ _ _ hi	- (3)
18. Ishika	- (3)	16. Akümüli nungi pilar	- (3)

OLONG PAITEP # 5997 TELANGZÜBA

TIPILEN :		LANGTSÜNGLEN :	
1. Telok, 4. Aluru, 6. Ozüng, 8. Emk,		1. Tenükjang, 2. Luden, 3. Kiochtsü,	
9. Kin, 10. Teti, 12. Süir, 13. Jen,		5. Lenti, 7. Tajangzük, 11. teronem,	
14. Ola, 16. Talak, 17. Mazük.		12. Sempa, 13. Jahaz.	



ALOKBAL PAR KHANDAN ULUBA, MERENBA SHISANGER.

Kiyonger : Oko Alok, tanü asüngbo mangur ato, kechisa inyaker ya?

Alokba : Aeee, oda kübu tanubu Director ba toagi duty meinyaka itasen agia alitsü yanglutsüji to, par rubber dong meyrjang pungu tema aliba lu nungto RCC ki ka süjang ta sen lakh pungu yokji labour sa anishia alinung okola Engineer ba toagi par fishery pond ka yanglushitsü sen yokji aji inyachtsü sentong atongerba ano ozü tantsü teko DIG bar süngolu nung inyachtsü labour bushidang anisetera ta alidang ano kanük BDO ba toagi tanü asüngsa yimdak parnok tanendak RCC ki ka asütsü sen lakh metsü yoktsü kü indang account number meshirba ta...

Kiyonger : Oko oko ataangma, ojang dang shiang, nenok ama nübener khandan tulu den sosemtsübo "Ayatai" asüja nooo.

Lilir : WhatsApp

TANÜBO NAI LANGZÜANG

Q. Linük kobai 2022 küm UN climate change conference COP27 ayongzüksü

[A] India [B] China [C] USA [D] Egypt

_____ (Taruba adok nung onoki langzüksü)

YASHI ADOK TELANGZÜBA: 18

AO OSHI ANGAZÜKDAK:
TANÜ ANGAZÜKTSÜBA OJANG

Lepdang
 (v) nok agi ana küma piladaktsüba (cut apart)
 * okolai alu nung per ka ana küma **lepdang**.

Lepdang
 (v) Telemtetba agütsüba (ultimate decision)
 * Telok nung mendenbubai tesüsa o **lepdang** agütsü.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo

Happy Birthday

1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA

- GAME JANGRARTEMI SAPUA ASAYABA ONLINE**
GAME KAR: 2021
1. PUBG
 2. Fortnite
 3. Call of Duty
 4. League of Legends
 5. Apex Legends
 6. Counter-Strike: Global Offensive
 7. Final Fantasy XIV
 8. Minecraft
 9. Hearthstone
 10. DOTA 2
-

SUDOKU # 6039 TELANGZÜBA # 6038

			2	9		5			5	6	7	3	2	9	4	8	1	
						5	7	2		4	2	9	1	8	5	6	3	7
2		9	3		7	8		4		3	1	8	7	4	6	5	9	2
	2		7	5	3	9				8	4	1	9	6	2	7	5	3
4	7		9							9	3	5	4	7	1	2	6	8
		9	5	4	2	6		3		6	7	2	5	3	8	9	1	4
				7	2		5	1		7	9	6	8	1	4	3	2	5
5		4			9			6		1	5	3	2	9	7	8	4	6
7	6	2	5		1		8			2	8	4	6	5	3	1	7	9

OJANG LUTEP # 5585

- ANGMERBA :
- END :
- LEMKÜI :
- SATA :
- UNGTAJ :
- HIRAMSA :
- PARMAEN :
- ORTEP :
- NGJUA :
- INYETTAKTER :

OJANG LUTEP TELANGZÜBA # 5584

NISUNG JASHIDANG MEREPTOKBA OSET
MERAKSARA IDAKJI TALI ANG MIT ADOKER

TAN HOPTA ATEMA - KOMA SÜLA ?

Q. Nagaland government-i bilemba ama, Nagaland nung Municipal aser Town Council-tem ya election magii dang tentet nunga koma süla ?



November 15, 2021 nü New Delhi nung Union Finance Minister, Union Ministers of State for Finance Pankaj Chaudhary (ajichi) aser Bhagwat Kishanrao Karad (abelen) nung leniba nung video conferencing ajanga Chief Minister tem, UTs nungi Lt. Governors aser State Finance Minister tem den senden amenba noksa nung angur.

Delhi nung mopung menenba nokdangtsü atema senden amentsü

New Delhi, Yimpoksüi/ November 15 (Agencies): Hombarnü Supreme Court-i Centre sorkar dang linük yimtiba, Delhi nung mopung kanga menenba azüoktsü atema asalentong yanglutsü asoshi rondak senden ka amentsüla, ta tuyuogo.

SC-i Centre dang menügdakba construction transport aser power plants anentsütsüla aser mapa inyakertem kidang nungi dang inyakdaksütsüla, ta metetdaksü.

Chief Justice, N V Ramana-i aniba bench-i Uttar Pradesh, Haryana, Punjab aser Delhi nung secretary tem dang iba senden nungji adentsü aser committee nem report agütsütsü tuyu.

SC-i, "Telangzüba agütsürtem indang affidavit ji onoki angadangogo aser itemji angadanga sülen onoki yamai asadantet- mopung kanga menenbaji alu nung monü arongba agi dang masü saka kiojen yangluba, industry nungi mokozü, power aser gari senzüba kulitem ajanga lir. National Capital Region aser Adjoining Areas nung Commission for Air Quality Management-i mera karbo agia inyakogo, ajisüaka mopung menenba nokdangtsü atema parnoki kechi inyaktsüar tejangja shia mali," ta metetdaksü.

"Iba tangatetba nungji ajemdaker onoki India sorkar dang asüng rondak senden ka ayongzüksü aser onoki metetdaksüba kulitem nung o

lemtepba sülen mopung menenba nokdangtsü atema telemtetba agitsü tuyuogo. Affidavits nung shia aliba agi, ita ana dak alia alu nung monü rondokba ajanga mopung menenbaji tera dang. Ajisüaka tang Haryana aser Punjab na nung monü kanga rondokdar," ta SC bench-isa metetdaksü.

Supreme Court-isa Punjab aser Haryana state sorkartem dang, taruba hopta ana tashi alu nung monü marongtsü atema aluyimertem dang tuyuang, ta metetdaksü.

Ano külen, Delhi nung AAP sorkari Supreme Court dang Delhi nung mopung menenba ajema akümtsü atema lockdown asütsü melunga lir, ta metetdaksü.

Delhi NCR aser temeket nung aliba state ajak nung lockdown benokra mopung kanga menenba azüoktetsü, ta AAP sorkari metetdaksü.

Delhi sorkari Supreme Court dang affidavit ka ajanga, "Mopung menenba azüoktsü atema GNCTD (Government of National Capital Territory of Delhi)-i lockdown asütsü melunga lir, ajisüaka lockdown ji NCR areas aser anasa aliba state ajak nung benok nungang nükjidong ataloktsü. Delhi ya tilaka dang, anungji Delhi kija nung lockdown ajanga kecha balaka masütsü. Anungji iba nungji ajemdaker India sorkar mesüra Commission for Air Quality Management-i NCR aser temeket state ajak nung kasa ozüngji benok nungbo onokia lockdown asütsü

melunga lir," ta metetdaksü. Environmental activist, Aditya Dubey aser law student Aman Banka nati Court dang alu nung monü rondokba anentsü atema aluyimertem nem 'stubble-removing machines' agüjang ta temepishiba ken o agüja liasü.

Delhi-NCR nung mopung kanga menenba ya rondak tebilemtsü onük kar lir, ta shia Honibarnü SC-i Delhi lockdown asütsü benokba den külemi Centre aser Delhi sorkar naprongla dang mopung quality tajungba akümtsü atema mera agia inyakang, ta tuyua liasü.

Supreme Court-isa, mopung kanga menenba ajanga nüburtemi pei ki telung nunga mask agitsüsa kümogo, ta metetdaksü.

Alu nung monü rondokba nokdangba agidangbo mopung menenba menokdangtetsü, kechiyong mopung menenba kulitem rongnung gari mokozü, firecrackers aser auyi densema lir, ta Supreme Court-i metetdakja liasü.

Supreme Court Chief Justice-i, aluyimertemi alu nung monü/azü rondokba ajanga mopung menenbaji shilem 25 dang lir, mopung menenba tanüngba shilem 75 jibo firecracker arongba, gari mokozü aser auyi apongba ajanga lir, ta metetdaksü.

Alima nung mopung quality tamajungtiba yimti 10 rongnungi tamajungtibaji Delhi lir, ta tawa climate group- IQAir-i metetdakja liasü. Delhi indang Air Quality Index (AQI) ji 556 lir.

India sorkari bendanger raliwalirtem atema tenokdangba agiener

New Delhi, November 15 (Agencies): Yaküm India nung coronavirus wara prok tenzükba sülen nungi bendang linük balala nungi raliwalirtem aruba nokdanga liasü; iba sülen ita 20 shi lir tang linük nung wara süngjemba den külemi nübur aika nem vaccine agütsüba sülen tang tanaben bendanger raliwalirtem atema arrtsü lapoktsüogo.

Yaküm March ita nung India sorkari tourist visa agütsüba anena liasü. Tangbo India-i vaccine dose anaprong agir alir bendangertem quarantine mesüdaksütsü saka sorkari bendangertem aruba sülen anogo 14 tashi parnok health mita reprangtsü.

Taoba ita nungi tenzükba nija tayimtsü nung arur bendangertem agizüka/melaa

liasü aser Hombar (November 15) nungi tenzükba commercial tayimtsü nung arurtem-a melar.

Tawa India nunger raliwalir aikati linük nung tourist tesemtem kanga bulua semdangdar.

India nung nisung crore 100 dak tema nem vaccine agütsüogo aser tang teshirangdakpur kanga ajema kümogo, ibayongji Diwali benjung nunga nisungtem kanga longsolongbena liasü.

Indian Railway Catering & Tourism Corp Ltd. nung tourism & marketing Director, Rajni Hasija-i, "Tourism sector nung tenokdangbatem agenba ya junger, ajisüaka kanga kümdangtsüla, kechiyong coronavirus wave tasembuba arutsüa akok," ta metetdaksü.



Bhopal, November 15, 2021: Linük nüchiso atema rarar aser tribal lenir, asür Birsas Munda nem akhüm agütsüba sentong nung Madhya Pradesh Chief Minister, Shivraj Singh Chouhan-i Ato kilonser, Narendra Modi agizükba noksa nung angur.

India Tir, Kovind-i Bangladesh semdangtsü

Dhaka/New Delhi, November 15 (Agencies): India Tir, Ram Nath Kovind-i December 16 nü Bangladesh yimtiba, Dhaka semdangtsü aser Victory Day anogomong sentong nung adentsü, ta Hombarnü Bangladesh Foreign Minister-i metetdaksü.

Bangladesh Tir, Abdul Hamid-i jaokba nung ajemdaker December 15-16 anogotem nung Ram Nath Kovind-i Bangladesh semdangtsü.

"India nunger Tir 14bubai tang mezüng Bangladesh semdangtsü," ta Bangladesh Foreign Minister, A K Abdul Momen-i metetdaksü.

December 6 nü Maitra Diwas anogomong nungtem nung Bangladesh aser India nati designing tetoktepba "Logo and Backdrop" ayongzükba agitsü, ta kasa osang nung shia lir.

Victory Day anogomong sentong nung adenba den külemi India Tiri tanga sentongtem nunga shilem agitsü.

Bangladesh-i Sheikh Mujibur Rahman sor küm 100 ajungba 'Mujib Borsho' sentong den külemi war of liberation amonger. India aser Bangladesh natisa linük ana tsüngda tesendaktep yanglur küm 50 ajungba benjung amonger.

1971 küm March 25 ayaterm nung taoba mapang East Pakistan ta ajaba linük nung Pakistan sepaitemi Bangladesh Liberation War tenzükba liasü aser iba rara ya December 16 nü anen.

Iba rara nung Pakistan-i tamakok angu aser Dhaka yimti nung India nunger sepaitem matsüngdang parnoki 'surrender' asütsüsa aküm.

Ita 9 tashi raradang nisung million 3 shi asü.

India aser Bangladesh nati December 6 nü ya Maitri Diwas (Friendship Day) ta amongtsü telemtetba agi, kechiyong 1971 küm iba anogo nung India-i Bangladesh agizük.

Taküm March ita nung India Ato kilonser, Narendra Modi-ia Bangladesh semdanga Ato kilonser, Sheikh Hasina den senden mena liasü. Iba mapang nungji lenir anati linük ana tsüngda lenla balala nung tesendaktep reprangshiba den külemi rongsenkettsüng aser sobaliba tsütsü tesendaktep ano tajungba akümtsü atema jembia liasü.

Modi-i semdangba mapang nungsa linük anati connectivity, commerce, information technology aser saisapong dak sendakba nung tezüngzüktep pongu agia liasü.



November 15, 2021 nü Bengaluru nung PES University pur 6buba Convocation sentong nung linük tatong tir, M. Venkaiah Naidu-i graduate students nem certificate agütsüba noksa nung angur. Kasa noksa nung Karnataka Angh, Thawar Chand Gehlot aser PES University Chancellor, Dr M R Doreswamy nata angur.

Austria nung COVID-19 mozü magir atema lockdown benoker

Vienna, Yimpoksüi/Nov. 15 (Agencies): Austria nung COVID-19 cases timba akumba mapang iba tashidak atema vaccine course tema magi aliba nisung million ana shi atema lockdown sangdongogo.

"Iba mera ya züpa-züpa magir, saka tia maka ibai kanga nungdaker," ta Chancellor Alexander Schallenberg-i ashi.

Vaccine magi aliba nisungtem mapa mesüra chiyongtsü alitsü ama kuli kar atema dang ki yutsür otettsü.

Austria nung nütsüng yongsük shilem 65 shi vaccine course tembanga agir lir, koba Western Europe nung tajemtiba alitsü.

Iba linük nung anogo tenet nung tashidak menaba ya nisung 100,000 rongnung 800 dak tema lir, koba region nung tematiba alitsü.

Ano Europe ya iba tashidak

agi tamajungtiba kongshiba tesem ka kumogo aser linük aika nung tenokdangba benoker.

Ajisüaka COVID-19 tashidak menaba timtiba aliba, UK nungbo tenokdangba tanaben mebenoki lir, kong health ketdangsürtemi lokti aser jara agi müketbanga aliba tesem nung tejak nembangtsü ajungshir.

Austria nung Hombarnü nungi tenzükba mera tasenba ya anogo ter atema lir.

Tanur arishi küm 12 tekübok aser tawa iba tashidak nungi taneptsü ngur alirtem iba tenokdangba nung madentsü.

Hopta tatemlen linük yimtiba, Vienna nung aliba chancellery kima nisung noklang aika adenshia longkak ait aser parnoki bena aliba banner nung "Onok temang asoshi lemtettsü onok temeden," ta zülua bena liasü.

Kü temeden asoshi ni rarar, ta tetsür longkak aiter kati ashi. Vaccine magi aliba nisungtem restaurant, hairdressers aser cinema-i arutsü nokdanga lir.

Nüburtem vaccine agiba metettsü atema nisung aliba tesem nung police temi asüngdangyatsü aser ozüng aibelener dang senchi achitsü, ta sorkari ashi.

Vaccine magi lockdown ozüng nung aibelener dang senchi sen €500 (£426; \$572) achitsü aser tendangba nung shilem agitsü memolunger dang temerenshi sen €1,450 meshitsü, ta Austria indang health ministry ajanga ashi.

Iba tenokdangba ya benoktsü lia Upper Austria nung mozü agitsü nungtepa liasü.

Saka sorkar anemer temi iba mera ya constitution nung mali aser iba ya ajanga second-class citizen adokdaksütsü, ta ashir.

Myanmar nung American nunger osangbener ka chiokogo

Bangkok, Yimpoksüi/November 15 (Agencies): Taoba mapang UN dangi US Ambassador Bill Richardson-i ashiba agi, America nunger osangbener Danny Fenster, Myanmar nung tepuokdak nungi chiokogo.

Richardson-i Hombarnü sangdong ka ajanga, Fenster tepuokdak nungi chiokogo aser Myanmar nung pa dangi

yokogo aser pa yakta Qatar ajanga kidangi aotsü.

Fenster ya online magazine Frontier Myanmar indang managing editor liasü aser pa Hokolbarnü osang tai prokshiba, ozüng alema tentetba lokti den sendaktepba aser visa temzüng ozüng nung aibelenba atema küm 11 tepuokdak ayutsü obendang agütsü.

Richardson-isa, pai tawa

Myanmar semdangba mapang military lenirtem den tejak o tejak na chitepa sensaksemogo aser iba mapang Fenster chioktsü atema mepeshia liasü, ta ashi.

February ita military-i sorkar atsüngtokba sülen Myanmar nung lenirtem aser osangbenertem densema military anema nokdakertem aika tepuokdak yua lir.

Indonesia nung Afghan nungertemi longkak ait

Jakarta, Yimpoksüi/November 15 (Agencies): Afghan nunger refugee aser tejenokdak bushir noklang aikati Hombarnü Jakarta nung UN refugee agency office kima longkak aita liasü. Parnok resettlement atema inyakyim takaratiba nung inyaksütsü khangna parnoki longkak ait.

Parnoki "onok kibongtem lendong nung lir. Yimlibilema takaratiba nung inyaksangshiang," aser "refugee tem nem talidak agüja takümtem kümzükang," ta banner tulu nung zülua bener United Nations High Commissioner for Refugees

office kima longkak aita liasü. Tejenokdak bushir chirnurtemai iba rally nung shilem agi aser parnok teka nung banner balala amer liasü. Bibi Rahima Farhangdost-i ashiba agi, Taliban-i la dang lar ki adena orr mapang minyaksü tetuyuba agütsüba sülen la Afghanistan kübok Ghazni province nung tesayur mapa inyaka aliba toktsür 2014 küm Indonesia-i aru.

Laisa, 2016 küm UNHCR nungi lai refugee card ka agizükogo, saka iba sülen la resettlement atema tanga jenjang kecha agia mali, ta ashi. "Ni kidang dang amunger,

kechiyong ni idaki mapa minyakteter. Küm ti ya mapang talangka," ta lai ashi.

Indonesia ya UN Refugee Convention nung sign asüba linük ka masü aser sorkari tejenokdak bushirtem mapa inyaksü mesera schools aser public mozükitem amshitsü memelar. Iba linük ya Malaysia, Thailand aser Australia amala nung tejenokda bushir refugee tem aika aliba linüktemi meketbanger lir.

2020 küm December ita Indonesia nung linük 50 nungi refugee 14,000 züngoksema liasü, aser parnok timba Afghan nungertem lir.

Germany nung Covid wara tamajungba akümer

Berlin, Yimpoksüi/November 15 (Agencies): Germany nung coronavirus wara pokteter tang tashidak tali menatapa aoba Hombarnü public health data ajanga sayuogo. Sorkar tasen ka tentettsü atema party asem sensaksemba mapang parnoki wara azüoktsü atema tang sentong kar yangludar.

Anogo tenet tsüngda tashidak menaba jenjang asadangba nung nisung 100,000 nung nisung 303 dak tashidak

mena aliba potetogo, koba anogo ka tejakdang nisung 289 dang liasü, ta Robert Koch Institute-i Hombarnü metetdaksüogo.

Kasa mapang nung nisung 43 asüba sülen asür ajak senteper nisung 97,715 jungogo.

Sorkar tasen ka tentettsü atema tang jembishinüa aliba party asemi wara prokshia aoba azüoktsü atema sentong yangludar, ta Greens co-leader Robert Habeck-i Brehostibarnü parnok sentong parliament nung mebenok

tsüngda shia liasü.

Tenokdangba agütsütsü aliba rongnung, nübutem adenshiba nokdangtsü densema lir. Honibarnü German state health minister asemi sorkar tasen tentettsü jembishinüa aliba party tem dang wara azüoktsü atema tetuyuba agütsütsü asoshi state nem tashi agütsür aliba atsülangtsütsü mepeshiogo, kong state tem mokdanga ayuba mesera school shibanga ayutsüba amala densema lir.

Office of the
Rionsanger Putu Menden (Village Council)
Mokokchung Village

TENÜNGSANG AGÜTSÜR

1. Wt. Moayangla Longkumer, Additional Secretary
2. Wb. Pangermayang, Deputy Director (Account)
3. Wb. Tekatemjen, District Programme Officer, Social Welfare
4. Wb. Lanuteka Ao, Station Superintendent, NST Mokokchung
5. Wt. Bendangsenla, Divisional Account Officer

Mokokchung nunger Senso tajung nenok pungoi taküm mapang aser nenok shisatsü tajungtiba agi nendaka inyakbayong pei-peitata wadang nung temaba jenjang ngutetba atema Rionsanger Putu Menden-i nenok maongka jenjang osang angashia kangasa pelaba tenüngsang agütsür.

Tarutsü nung ano maneni Tsüngremi nenok taküm, kibong aser nenok wadang nung maneni len aniang ta sarasademtsür.


(IMONUNGBA)
CHAIRMAN

Mokokchung Village Council


(N. TOSHI KICHU)
SECRETARY

Mokokchung Village Council

Office of the
Meküli Village Council

Mokokchung : Nagaland

TENÜNGSANG AGÜTSÜR

Wb. Rongsenlemba Jamir, Wb. Tinumeren Jamir aser Wt. R. Amongla na jabaso, pai Department of personnel and Administrative Reforms (P&AR), Government of Nagaland nung Secretary menden ngutet nung, ozü Meküli Village Council ajanga pa nem tenüngsang tulu agütsür. Meküli nunger rongnungi iba jenjang anguba ya pa mezüngbuba lir.

Nai iba ama menden tajung ngutetba asoshi ajaki pelar. Tsüngremi lenir nem anema aliba den arishi talang moajangma.

Sd/-
Toshilemba
Chairman

Sd/-
Imliwapang
Secretary

MEKÜLI SENSO TELONGJEM KOHIMA NAGALAND

Tenüngsang Agütsür

Meküli Senso Telongjem Kohima ajanga Wb. Rongsenlemba Jamir (Wb. Tinumeren Jamir aser Wt. Rendimongla Walling jabaso) Secretary menden, Government of Nagaland tongtetba atema pa nem tenüngsang aser tetushi agütsür.

Maparen jenjang tuluba nung inyaka aodang Tsüngremer tawapangba aser shisatsü maneni lidakjang aser Pai nü taküm awapanga aniangma.

Sd/-
TEMSUCHANG
President, MSTK

Sd/-
TEMJENMEREN JAMIR
Secretary, MSTK



OFFICE OF THE
SATSÜKBA WATSÜ TELONGJEM

P.O. : Longnak

B.P.O : Mangkolemba, Mokokchung - 798601

Tenüngsang Agütsür

Sensotsür tajung Mrs. Imsennochetla Longchar, Tsüngrem nem bendanga agütsüba taküm ajanga Sensotsür aser Sensosanger ajak pelateptsüsa tanüng tajung bener aruja ABAM nung Music Coordinator inyaksüsa yimli tulu angu nung Satsükba Watsü Telen ajanga le nem tenüngsang agütsür aser Tsüngrem tenüng sanga ABAM dang pelaba lemsateper.

La Music Education nung Master of Music degree Bangalore Conservatory institution nungi 2018 nung angu aser iba sülen la azüngba kasa institution nung Music tesayur inyaka lia Tsüngremer maongka tulu ajanga 2021 nungi ABAM nung tenzüktsü yimli angu nung la tenüng as anger. Tsüngremi ne wadang nung maneni moajangma ta asen senso Watsü Telen ajanga sarasademtsür.

Sd/-
Tiasenla
Tir

Sd/-
Nochetla
Tongti Tezülur

Noklak nung Traffic Islands asere Flower Bed lapokogo

Noklak, Yimpoksüi/ November 15, 2021 (TYO): Honibarnü (13.11.2021) Advisor, Fisheries & Aquatic Resources, Evaluation, Economics & Statistics aser DPDB Chairman, Noklak, L. Khumo-i Noklak Town lenjem (main junction) nung Traffic Islands aser Flower Bed lapokotsüogo, ta sangdong ajanga metetdaksü.

Iba sentong nung, Khumo-i, Noklak nung "Frontier District" temaitsü agütsü asünung, tajung asoshi meranga inyaksü aser tajung inyaksü angazüksü aser merükmejuba maparen ajungkettsütsü atema district nung alir nüburtem ayongzük.

Kenü yongi mesüra khen nung terenlok maparen ataloktsü makok, saka asenoki dang meranga aser sorkar sentong nung amalitepa inyakra terenlok maparen maneni aotsü; aser district nung terenlok maparen tsütsü takok ajangzüketsütsü aser ibaji alimai angutsü," ta pai shisem.

Lenla ajunga nung terenlok alitsü asoshi district administration aser tanga sorkar tekolakpurtem den longjemer inyaksü nungdaker, ta Advisor-i nüburtem dang mepishi.

Khumo-i, Noklak Town indang Chairman aser GBs dang pei pei tata tesem nung lemzüksüba maparen junga inyaksü aser merükmejua alitsü asoshi ayongzük.

Noklak Town tepor jungdaksütsü aser Traffic Islands yangluba atema pai District Administration, DPDB aser külem sendaktepa alir ajak dang pelaba metetdaksü.

Deputy Commissioner, Noklak, Hiazu Meru-i, Noklak Town ya DPDB Town ama agizükba sülen iba maparen mezüing takok ngua inyaktetter asütsü aser tarutsü nunga terenlok maparen aika inyaksü sentong lir, ta ashi.

State nung Noklak Town ya temerüktiba jila kümdaksütsü aser 'public property' anepalutsü asoshi Meru-isa Noklak sensopurtem ayongzüka liasü.

Iba sentong nung District Planning Officer, Noklak, Imsumeren Jamir menden liasü aser C. Phuniang SDO (Civil) & Administrator, Noklak Town Council ajanga okila jembi. Shangchiu-i ken ka tena telok saksalemdaksü. Traffic Islands aser Flower Bed meshitetta Longdon Town Baptist Church, Noklak, Pastor, Penglang-i sarasadem, ta kasa sangdong nung shia lir.

**Office of the
Mokokchung Senso Mungdang
KONANG TETUSHI AGÜTSÜR**

Mokokchung yimer Senso rongnungi Sorkar tenzükba wadang nung bendanga aser nendaka inyakba ngua nenok kwikati pei inyakba Department nung temaba menden ajangzüketogoo, Senso Mungdang mendenti ajanga tetushi agütsür.

Tarutsü anogotem nunga nübur tenzükba wadang nung nenok taküm maneni Tsüngremi moaja aniangma.

1. Mrs. Moayangla Longkumer, Additional Secretary, (Nagaland Secretariat Service)
2. Mr. Pangermayang, Dy. Director, (Treasuries and Accounts)
3. Mrs. Bendangsenla, DAO (Treasuries and Accounts)
4. Mr. Lanuteka Ao, Station Superintendent (NST)

**Sd/-
Temjenzulu Lkr
Tir****Sd/-
Imnawapang Kichu
Tongti Zülur**

**Office of the
Bharatiya Janata Party
Lakhuni Unit
30 Alongtaki Mandal**

TEPELA LEMSATEPER

Ozü yimti nung nüburtem nungdak reprangteta Shri. Temjen Imna Along (Minister for Higher Education and Tribal Affairs & State BJP President), pai rongsen tulu agüja BJP Lakhuni Unit lenisüba kübok 15th Nov. 2021 anogo nung yimdak kibong shia nem sintex (1000 Ltr) kaka lemtesüogo. Pei nübur nungdak reprangteta mapa tajung inyaba asoshi BJP Lakhuni Unit-i asen lenir dang kanga pelaba metetdaksür. Teyanglur Tsüngremi na aser ne wadang maneni moajangma.

**Sd/-
President
BJP Lakhuni Unit**



India's Best Dancer tetoktepa nung takok ngua atusang arishi küm 26 tain Sp. Meyitemsü Naga (achichi nungi tanabuba) nem Ao Kaketshir Mungdang (AKM)-i tenüngsang agütsüba sentong ka AKM office Mokokchung nung agiba mapang tangokba noksa nung angur. AKM-i Ao kin, Naga nunger aser north-east India sanger ajak dang Meyitemsü Naga nungita yaritsü asoshi tayongzükba ka ayimoktsüogo. Meyitemsü Naga ya Chuchuyimlang nunger Mokokchung town nung alir Wb. Supongchuba'r jabaso lir. Taoba mapanga pai reality show sentong tulu aika nung shilem tajung agia lir aser Naga nunger rongnung lanur tsüngsanger tajung rongnung pa ya ka asütsü ta züngshir.

Chakroma Youth Organisation-i AR dang pelaba metetdaksü

Dimapur, Yimpoksüi/ November 15, 2021 (TYO): Gol "Khelo India Khelo" indang mapatong kübok Medziphema nung lanurtem tsüngda saisapong aser temang a n e p a l u b a r e n ajungkettsütsü atema saipongtem ayongzükba atema Chakroma Youth Organisation (CYO)-i Assam Rifles dang pelaba metetdaksü. Mapang shia saisapong balala ayongzükba den asayamung nung senotsü (sponsor) agi yaria aser lanur nem saisapong osettsüset tem agütsüba

P E L A R



20.10.1930 - 10.11.2021

*Ibai Kibuba süngküm lir;
Temeshipur aji agi aitsü. - T. Ken 118:20*

Kodanga amadoktsü makokba taremsük tsürapur **Asür Resüba Pongen**, pa shirangba mapang nungi tasüba anogo tashi shirnokisa yaritepogo, nenok ajak dang kanga dang pelar. Tsüngremi nenok ajak maneni moajang ta ozü sarasadem. **~ Kinungertem.**

MULUNGNE O



20/09/1943 - 09/11/2021

Onoki teti meima aliba obala **asür Sashikaba Lemtur** (Mopungchuket), pa shirangba mapang nungi asü pila sentong tashi shirisa nübu, rongsen aser sarasadem agi yaritepogo, asür kibongi nenok ajak dang pelaba metetdaksür. Nenok temeim mapa asoshi ozü kecha meyipa magütsüet, saka Tulusang Tsüngremi nenok ajak moajang ta ozü sarasadem. **Temeim Kinungtsü, chirnurtem, semchisemnur aser kinungertem**

**OFFICE OF THE
KANGTSÜNG SENSO MUNG DANG
P.O. Tuli - 798618
Dist. Mokokchung :: Nagaland**

TAKOK NÜNGSANG

Sorkar mapa nung nendaka inyaker Kangtsüng Senso rongnungi pei wadang nung temaba jenjangi ajungketba ajanga sensosanger dangi konang tulu bener arutsü nung sensosanger ajaki nenok ajak nem tenüngsang tulu agütsür. Tsüngremi nenok wadang, taküm aser kibong maneni moajangma.

Name	Promoted to	Department
1. Wb. I. Chuba Lemtur	(Sr - AO)	Treasuries and Accounts Govt. of Nagaland.
2. Wb. Lanuchuba	(AO)	Treasuries and Accounts Govt. of Nagaland.
3. Wt. Imlinaro	(DAO)	Treasuries and Accounts Govt. of Nagaland.
4. Wb. R. Atuba Jamir	(AGM)	NST Govt. of Nagaland.
5. Wb. Imlitenzuk	(Sr DH/A)	PHED Govt. of Nagaland.

Iba dak alaka Kr. Arentila Azukumer D/o. S. Imdong Ao aser Apenla, Miss Mokokchung 2021 toktepa nung tanabuba jenjang ngutet nung sensosanger ajaki nü nem tenüngsang aser tetushi tulu agütsür. Tsüngremi na arishi talang moajangma aser ano maneni nü kaket reju aser loktiliba ajak nung temaba jenjang nung ajungketjangma.

**Sd/-
Tongpang Longkumer
President
Kangtsüng Senso Mungdang****Sd/-
Temjen Pongen
General Secretary
Kangtsüng Senso Mungdang**

atema Chakroma Youth organization, yimertem aser Medziphema town council member temi Ghaspani Battalion dang pelaba lemsatep. Iba tepela temaitsü sayutsü asoshi parnoki Assam Rifles indang Ghaspani Battalion nem certificate ka agüja liasü. Medziphema Town kübok October 23, 2021 nungi tashia Chakroma Youth Annual Sports meet ayonga asayaba mapang, iba Unit ajanga kanga nungita yariogo, ta kasa sangdong nung shia lir.

DECF aser KDVCC na cricket exhibition match ka asaya



Dimapur, Yimpoksüi/ November 15 (TYO): Dimapur Ex-Cricketers Forum (DECF) and Kohima District Veterans Cricket Club (KDVCC) na Nagaland Cricket Stadium, Sovima nung November 13 nü veteran cricket exhibition match ka asayaogo.

Honibarnü tanabuba asaya nung Dimapur veterans batsmen temi kanga junga asayaa parnoki run 127 agi asaya koka liasü.

Mezüngbuba asaya nung KDVCC-i toss akok aser mezüng field asütsü shim. Kohima team nungi bowler temi ball kanga junga onaka DECF-i over 20 nung run 123 yanglu. Dimapur team atema Vishu-i run 46 yanglua liasü aser KDVCC nungi asayar Merentemsu-i wicket 2 agi.

Run arishiba mapang KDVCC nungi asayartemi kanga junga asaya tenzük aser mezüngbuba over ana nung run 22 yanglu, ajisüaka asaya tatemi DECF nungi bowler temi ball kanga junga ona KDVCC pur run 106 nung ajak out sütsü. KDVCC atema Sunep-i run 16 aser Limasunep-ia run 16 yanglu.

Dimapur team atema Vishu aser Rex nati wicket anana agi. Iba asaya nung DECF nungi asayar Vishu nem Man of the Match naroküm agütsü.

Tanabuba asaya nung KDVCC-i maneni toss akok aser field asütsü shim. Mezüng bat asüba sülen Toni aser Dhiraj (tenaprongla yirur tguatok) nati half century yanglua DECF-i asayar 4 out ser run 215 yangluba nung teyari tulu agütsü. KDVCC nungi asayar Kekhrievor-i wicket ana agi.

Mezüngbuba asaya nungi run 17 bendenloker run 232 arishi tenzükba sülen Kohima nungi asayartemi run 105 dang yanglur asayar ajak out süma. KDVCC atema Atha aser Kekhrievor nati run 26 aser 17 yanglua liasü. DECF atema Rishi-i wicket 3 agi aser Dhiraj o Dolly nati wicket anana agia liasü. Asaya tanabuba nung Dimapur team nungi asayar Dhiraj nem Man of the Match naroküm agütsü.

Asaya shibangba sentong nung host Senti Longkumer-i, Nagaland Cricket Association (NCA) tir aser külem tenzükertem dang Kohima aser Dimapur nungi asayar

tejentem longjemtsü atema maongka agütsüba atema pelaba lemsatsep. Kasa mapang nung NCA General Secretary, Hyunilo Khing-i, iba exhibition asaya ya veteran tem atema mezüngbuba asaya lir ta ashiba den tanga district-ia tarutsü nung iba sülen anikdaksü imlaba lemsatsep. Paisa, küm nung tain kümaka cricket asaya meimba ajanga asayatsü ajungmesor aser medenser iba ajanga temang anema toktsütsü, ta ashi. Pai takokertem nem sempet lemja liasü.

Maneni KDVCC tir Atsato Kibami-i, veteran cricket asaya ya maneni asayayonga aotsüla aser tanga district-a anisemtsüla ta ashi. Pai, par club Home Department nung 2019 küm September 26 nü züngoksemogo aser parnok nukjidongji lanur cricket asayartem ajungkettsü atema lir, ta metetdaksü.

KDVCC aser DECF nati, NCA ketdangsürtem, Hemkunt Motors, team anaprongla nungi tenla agütsürtem, umpires Mustafa & Tia Tzudir, aser tanga volunteeer tem dang kanga pelaba lemsatsepogo.

NBA-i selection trial ka ayongzüka agitsü

Dimapur, Yimpoksüi/ November 15 (TYO): Boys (U-18), 71buba Junior National Basketball Championship atema asayartem shimtsü asoshi Nagaland Basketball Association-i trials ka ayongzüka agitsü.

Iba asayamung ya Indore, Madhya Pradesh nung 2022 küm January ita 4 nungi 10 tashi asayatsü.

Iba trail ya shilem ana küma lemsar agitsü. Mezüngbuba selection trials ya Christ King

Higher Secondary School, Kohima nung November 19 aser 20 nü nikonngsütsü 3:00 ako nungi tenzükba agitsü.

Tanabuba selection trials November 26 aser 27 nü Christian Higher Secondary School nung nikonngsütsü 2:30 ako nungi tenzükba agitsü. Trail nung shimba asayartem Nagaland tenüng nungi 71buba Junior National Basketball Championship nung asayatsü.

Iba trail nung 2003 küm January 1 nü asortem aser iba

sülen asortem dang shilem agitettsü. Maneni asayartem dang birth certificates & Aadhar card bener arutsü metetdaksüogo.

Osang tejangjaba agitsü atema item number; +91 94360 16529/84139 94697 (Kohima), +91 98640 34256/70056 20288 (Dimapur) nung tongteprateptetsü, ta Nagaland Basketball Association Hon. Secretary Zasivi Meyase-i sangdong ka ajanga metetdaksüogo.

Norwich City coach asütsü Dean Smith shimogo

Yimpoksüi/November 15, 2021 (Agencies): Premier League nung tekübokba jenjang nung aliba club, Norwich City-i Hombarnü taoba Aston Villa coach Dean Smith, parnok indang coach tasenba asütsü shimogo.

Arishi küm 50 tain Smith, shiba Villa-i November 7 nü mapa nungi anenja liasü, pai club den küm ana ser tesaadang atema tenangzüktepba ka yangluogo, ta club sangdong ka ajanga metetdaksü.

Smith-i Daniel Farke melentsü, shiba November 6 nü mapa nungi anentsüogo.

"Anogo tenet tsüngda aika atalokogo, saka Premier League nung Norwich City nungi inyaksü atema tanaben meyipa aruba atema kanga pelar," ta Smith-i ashi. Smith nem teyari agüja Craig Shakespeare assistant head coach asütsü.

"Küm pezüser tesaadang iba club nung maparen tajung kar benoka inyaka arudar aser tang iba mapa tajungba küma inyakyonga aotsü atema ni aser Craig mapa asütsü aser talisa Premier League nungi metugutsü atema inyaksü.

"Norwich City ya club tuluka aser club süoki ia pusemertem aika lir, shirnoki club nung shilem ka asütsü koda tongtibang aji angateta lir," ta paisa ashi.

Taoba Chelsea manager Frank Lampard nem iba mapa agütsünüa liasü, ajisüaka pai



mapa magizükba sülen Smith shim.

Norwich puri iba season nung mezüngbuba takok anguba nü Farke mapa nungi anen. Parnoki iba asaya goal 2-1 agi Brentford madak takok ngua liasü.

German nunger coach yagi Norwich pur taoba season Championship nungi PL-i anir atu, ajisüaka asayar tasen aika aniokaka Premier League relegation zone nungi club manitettet.

Norwich pur Premier League nung taruba asaya Southampton den November 20 nü asayatsü aser Smith-i ashiba agi, iba asaya atema pa matateter.

"Küm 16 asüadang nungi ni football nung shilem agia aruogo. Iba mapang ni ita pezü football asaya nung shilem magitet, koba kecha jangrademtsü maliasü.

"Tejakleni renloka aotsü jangraba club ka nung densemba atema kanga pelar," ta pai ashi.

State level Iijak kashishiba tetoktepba agiogo



Dimapur, Yimpoksüi/ November 15 (TYO): Mezüngbuba State level Catapult Target Hitting Competition, November 15 nü Heritage Village, Kisama nung asayaogo.

Iba sentong ya India renlokyonga aruba nung tongtibang shilem agirtem nem bendanga agütsüba ama aser Indian tribal freedom fighter, Bhagwan Birsa Munda asoba hopta nungtem nung ayongzüka agiogo.

Bhagwan Birsa Munda Birth Anniversary ya linük ajunga

nung November 15 nungi 22 nü tashi amunger.

Iba tetoktepba nung nisung 25-i shilem agi. Iba tetoktepba ya Mhonthung-i akok aser tanabuba aser tasembuba jenjang nung Yibemo aser Among na liasü.

Tetoktepba ya Additional Secretary, Nchumbemo Lotha-i tenzükja liasü. 'Azadi Ka Amrit Mahotsav' amungba nung shilem ka ama Department of Tribal affairs, Government of Nagaland-i iba tetoktepba ayongzüka liasü.

BILEMDANGANG

"Makamaityonga tangar timtema angudang pei akaba agi lemsateper."